

後村先生大全集

二一

後村先生大全集卷之八十四

商書講義

盤庚中

盤庚作惟涉河以民遷

作起也諭民以必遷之意

乃誥民之弗率誕告用亶其有衆

話善言也蘇氏曰民之弗率不以政令齊之而以話言曉之仁也亶誠也以誠意大告於衆

咸造勿裒在王庭盤庚乃登進厥民曰明聽朕言無荒失朕命

中上二篇正義以為未遷時事呂氏以中篇為已
離舊都未至新邑方有懷土之思未見安居之樂
盤庚於中路使民造庭聽我告諭而無敢慢褻王
庭蓋道路中行言如周禮掌次是也呂說得之

嗚呼古我前后罔不惟民之承保后胥感鮮以不浮
於天時

承順也言我先王順從民欲民亦保我先王而與
之同其休戚浮行也言君既恤民之憂民亦行君
之令君與民皆行天時

殷降大虐先王不懷厥攸作視民利用遷

虐災也言邑居墊隘水泉鹹鹵懷思也言先王不
思故居厥攸作猶言盤庚作視民有利則用徙
汝曷勿念我古后之聞

言先王遷事

承汝俾汝惟喜康共非汝有咎比于罰
言我法先王順汝欲使汝安且樂非謂汝有咎惡
徒汝比近於殃罰之

予若籲懷茲新邑亦惟汝故以否從厥志
言予所以招呼懷來新邑之人者亦惟以汝故也
將使汝久居而安以大從汝志

今予將試以汝遷安定厥邦

既涉河而遷矣猶言將試以汝遷以觀安定與否
呂氏謂於此見盤庚不自用處

臣按商之都邑世有河患湯已前勿論矣自湯
至盤庚凡五遷夫思患預防君之遠慮安土懷
居民之淺見臨以君令孰敢不從而盤庚之弗
率者登之進之而不鄙夷詁之告之而無忿疾曰
天時曰降大虐謂天時當遷非人所能違也曰
古我前后曰古后之聞謂先王嘗遷而非自我
作古也曰先王不懷雖先王不思此上矣曰視

民利用遷曰俾汝惟善康其盖欲利汝非以害
汝欲汝安且樂非欲汝勞且怨也曰惟民之承
曰承汝曰亦惟汝故曰丕從厥志皆屈己以順
民非強民以從己也古者行利民之政尚恐人
情之疑信必耳提面命使之洞曉後世為弗民
之事不計人情之違順但勢驅威迫劫以必從
嗚呼此盤庚所以為賢王歟

汝不憂朕心之攸困乃咸大不宣乃心欽念以忱動
予一人爾惟自鞠自苦

所困謂戒心憂汝汝乃大不布腹心以誠敬感動

我徒然胥怨自取窮苦

若乘舟汝弗濟臭厥載

不遷之害如舟在中流不渡臭敗所載之物

爾忱不屬惟胥以忱不具或稽自怨曷瘳

汝忱不能上遠又不能考其利害及淪胥禍至但
自怨怒疾何以瘳

汝不謀長以思乃災汝誕勸憂

不計遠慮惠而樂於危亡

今其有今罔後汝何生在上

有今無後何以久生

今予命汝一無起穢以自臭

命汝一德一心也起穢自臭正義以為覆述上文
臭厥載之意

恐人倚乃身迂乃心

正義曰倚曲也迂迴也恐汝為人所誤身心迴曲
不欲遷徙

牙迂續乃命於天子豈汝威用奉畜汝衆

言所以遷者欲迎續汝命于天欲養汝衆非以威
脅

臣謂邑居塾隘水泉鹹鹵民之通惠非君之私

憂是時君民皆遷徙皆勞苦君軫民之患而民
不恤君之憂妄相扇動至於不忱不敬故盤庚
反覆告戒比之上篇尤為深切乘舟者期於濟
弗濟則所載之物臭敗於中流矣行道者期於
至弗至則養生之具蕩折於半途矣胥忱言懷
安必死於溺也曷瘳言胥怨何損於病也勸憂
猶孟子言安其危而利其災樂其所以亡也有
今罔後猶僂言有今日無明日也自鞠自苦自
怒自臭言自作孽也倚乃身迂乃心言趨利避
害當勇猛而決裂不當迴曲而前却也迴曲二

字乃民心迷惑而然曰欽曰忱曰謀曰思皆自
其心之迷惑者而啓迪之使之曉然更相告語
云去舊邑至新都溺者更生矣病者有瘳矣憂
者恕者鞠者若者皆樂業矣不遷之害如彼遷
之利如此汝盍知所擇乎曰迺續汝命曰畜養
汝衆曰予豈汝威其意愈確認親切而其辭愈
雍容和緩三代君民與相之際情文如此視秦
漢以下詔令不侔矣

予念我先神后之勞爾先予丕克羞爾用懷爾然
言我先哲王撫勞爾之先人我今亦欲養汝念汝

而然

失于政陳于茲高后丕乃崇降罪疾曰曷虐朕民
陳久也腐也若久予此則將腐敗而後已我高后
將重降罪疾於我曰何為不遽以虐吾民

汝萬民乃不生生暨予一人猷同心先后丕降與汝
罪疾曰曷不暨朕幼孫有比故有爽德自上其罰汝
汝罔能典

汝不念生生之計與我同心謀遷我先后又將重
降罪疾於汝曰曷不與我幼孫相親比以從乎幼
孫盤庚自謂也爽德言先后明德在天心罰汝汝

將何辭

古我先后既勞乃祖乃父汝共作我畜民汝有戕則
在乃心我先后綏乃祖乃父乃祖乃父乃斷棄汝不
救乃死

汝為我養民乃有殘民之心鬼神之所京絕也言
汝父祖亦不祐汝

茲予有亂政同位其乃貝玉乃祖乃祖丕乃告我高
后曰作丕刑于朕孫迪高后丕乃崇降勿祥

亂治也蘇氏曰凡吾亂政同治之臣敢利汝貝玉
則其祖當告我高后而誅之古者君民通稱朕故

臣民之孫子曰朕孫

臣按上篇已有此論至此又再三申言之謂遷非已意乃我先后及汝乃祖乃父之意汝違戒可也我先后其可違乎汝祖父其可違乎曰神后曰高后曰先后泛指先王嘗遷者非專指湯也曰罪戾曰斷棄曰丕刑曰不祥言必至之禍首及我次及汝也曰乃祖父告我高后說者以為商俗明鬼假設是辭非也正義曰不從君為不忠違祖父為不孝欲其從君順祖陳忠孝之義以督勵之其說甚正臣深味此章竊以為

物本大人本祖君民之分雖異其情一也遷國
大事念昔先王與汝先人經營創造之難今我
與汝跋履道路之勤大而生生之業微而貝玉
之類悉為區畫通君民為一家合上下為一心
想聞其語者油然動其熙蒿悽愴之心洋洋乎
如在其上如在其左右矣哉 仁宗嘗語王素
曰朕 真宗子卿王旦子深得此意

嗚呼今予告汝不易

易字正義讀為難易之易與下文意貫王肅解為
變易之易亦通

永敬大恤無胥絕遠

蘇氏曰遷國大憂也君臣與民一德一心而後可相絕遠則殆矣

汝分猷念以相從各設中于乃心

群臣當分明相與謀念和協以相從設中猶言立的也

乃有不吉不迪顛越不恭暫遇姦宄

謂不善者不道者犯上者奪人之貨者左傳曰亂在內為姦在內為宄

戎乃剽殄滅之無遺育無俾易種于茲新邑

當割絕滅之勿遺種於新都

往哉生生今予將試以汝遷永建乃家

正義曰長立汝家謂賜之以族卿大夫稱家臣曰
非也臣民通稱家

臣以為此章乃詰上文訓告之辭永敬大恤即前
所謂殷降大虐惟胥以忱也無胥絕遠即前所謂不
暨予一人猷同心也汝分猷念以相從即前所謂
汝不謀長以思乃災也丁寧告戒詞窮理盡然後
使之設中于心蓋人心各有中正之理昔迷而今
悟昔違而今順繫乎此中之設與不設而已既悟矣

既順矣既遷矣然而猶有不善者不道者犯上者奪
人之貨者是下愚不肖不可語言之人然後殄滅
之刑行焉或曰此言與予豈汝威之意若相反臣按
正義曰惡種在善人之中則善人亦變易為惡故
必絕其類又曰易種猶今之俗言相染易其說甚
精確曰往哉生生曰汝何生在上曰汝萬民乃不
生生凡三言之謂遷以利民非止利君也曰今予
試以汝遷永建乃家曰今予試以汝遷安定厥邦
凡再言之謂將為臣民建家非止為國定都也字
字句句起結相應昔人乃謂盤詰聲牙詰曲難讀